



Odgajanje i popravljavanje srca (Medina)

Hatib: dr. Abdullah ibn Abdurrahman el-Buajdžan

11. ševval 1443. godine po Hidžri / 13. maj 2022.

Hvala Allahu Koji pruža utočište svakome ko se Njemu prikloni i Koji je pripremio džennetsko boravište svakome ko teži Njemu. Svjedočim da nema boga osim Allaha, jedinog, Koji nema druga, i Koji se iznad Arša uzvisio, i svjedočim da je Muhammed, sallallahu alejhi ve sellem, Njegov rob i poslanik, Koji nije s Pravog puta skrenuo i nije zalutao, "on ne govori po hiru svome – to je samo Objava koja mu se obznanjuje" (En-Nedžm, 3–4). Dostavio je poslanicu, ispunio emanet, savjetovao ummet i naredio je bogobožnost, neka su na njega Allahova milost, blagoslov i spas, i na njegovu porodicu i ashabe i sve one koji ih slijede u dobročinstvu i svoju dušu uzdržavaju od prohtjeva. Najbolji govor je Allahov objavljeni govor, a najbolja uputa je uputa Muhammeda, sina Abdullahovog, odlikovanog među ljudima. Najgore stvari u vjeri su novotarije, svaka novotarija je zabluda, a svaka zabluda vodi u Vatru. Allahovi robovi, oporučujem sebi i vama bogobožnost, nema sreće osim s bogobožnošću, i nema uspjeha osim s pokornošću Gospodaru.

Znajte da je pokornost Allahu najveće bogatstvo i opskrba, a Njegovo zadovoljstvo je najbolja zarada i najuzvišeniji cilj. Džennet je prekriven neugodnostima, a Džehennem strastima. "I samo na Sudnjem danu dobit ćete u potpunosti plaće vaše, i ko bude od Vatre udaljen i u Džennet uveden – taj je postigao šta je želio." (Ali Imran, 185)

O ljudi, srce je posuda za dobro i zlo u čovjeku. Ono je izvor nevjerovanja i vjerovanja. Ono je predvodnik svih ostalih organa i odgovorno je za njihovo pravilno usmjeravanje, i alatka razuma kojom se postiže opažanje i razumijevanje. Ako je ono zdravo, zdravo je čitavo tijelo, a ako je ono bolesno, bolesni su i ostali organi. Numan ibn Bešir, radijallahu anhu, rekao je: "Čuo sam Allahovog Poslanika, sallallahu alejhi





ve sellem, da kaže: "Zaista u tijelu postoji jedan organ, i ako je on zdrav, bit će zdravi i ostali organi, a ako je on bolestan, bit će bolesni i ostali organi, a taj organ je srce." (Muttefekun alejhi)

O vjernici, srca su skrovišta volje i slobodnog izbora, temelj i razlog odgovornosti i ispita, od njih zavisi primanje djela kod Allaha (kabul), umnogostručavanje nagrade i kazne. Omer ibn Hattab, radijallahu anhu, prenosi da je Allahov Poslanik, sallallahu alejhi ve sellem, rekao: "Djela se vrijeduju prema namjerama, i svakom čovjeku pripada ono što je naumio (svojim djelom)." (Muttefekun alejhi)

Nijet, namjera, sredstvo je za uvećanje nagrade. Allah, džellešānuhu, nagrađuje za lijepu namjeru, a ne kažnjava za lošu. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Ko naumi učiniti dobro djelo, pa ga ne učini, bit će mu upisano jedno dobro djelo, a ako ga učini, bit će mu upisano od deset do sedamsto dobrih djela. Ko naumi učiniti loše djelo, pa ga ne učini, neće mu biti upisano, a ako ga učini, bit će mu upisano samo jedno loše djelo." (Muslim) Nijet je uvjet ispravnosti i primanja djela, i uvjet kažnjavanja zbog njih. Uzvišeni kaže: "Nije grijeh ako u tome pogriješite, grijeh je ako to namjerno učinite; a Allah prašta i samilostan je." (El-Ahzab, 5)

O ljudi, srca se brzo mijenjaju i jako su prevrtljiva. Mikdad ibn Esved, radijallahu anhu, rekao je: "Neću o čovjeku reći ni dobro ni loše, sve dok ne vidim u kakvom je stanju napustio ovaj svijet, nakon jedne stvari koju sam čuo od Poslanika, sallallahu alejhi ve sellem." Prisutni su upitali: "A šta si to čuo od Poslanika, sallallahu alejhi ve sellem?", a on reče: "Čuo sam Allahovog Poslanika, sallallahu alejhi ve sellem, da kaže: 'Čovjekovo srce prevrtljivije je od lonca kada u njemu ključa voda.'" (Ahmed)

O vjernici! Allah, džellešānuhu, ispituje ljudska srca smutnjama, nedaćama i iskušenjima. Ko je u svojoj nutrini, koja je poznata samo Allahu, iskren u odnosu prema Njemu, On će ga učvrstiti i usrećiti na dunjaluku i ahiretu. Uzvišeni kaže: "Allah će vjernike postojanom riječju učvrstiti i na ovome i na onome svijetu, a nevjernike će u zabludi ostaviti; Allah radi šta hoće." (Ibrahim, 27)





O Ti Koji usmjeravaš srca, usmjeri naša srca ka pokornosti Tebi, o Ti Koji okrećeš srca, učvrsti naša srca do smrti. Srca se nalaze između dva prsta Milostivog i On ih okreće kako želi. Šehr ibn Havšeb kazuje: "Upitao sam Ummu Selemu, radijallahu anha: 'Majko pravovjernih, koju je dovu Allahov Poslanik, sallallahu alejhi ve sellem, najčešće učio kada je bio kod tebe?', a ona je odgovorila: 'Najčešće je učio ovu dovu: Ja mukallibel-kulubi sebbit kulubena ala dinik! – O Ti Koji okrećeš ljudska srca, učvrsti moje srce u Svojoj vjeri!' Upitala sam ga: 'Allahov Poslaniče, zašto najčešće učiš dovu: 'Ti koji okrećeš ljudska srca, učvrsti moje srce u Svojoj vjeri?', a on mi reče: 'O Ummu Selema, nema nijednog čovjeka a da njegovo srce nije između dva Allahova prsta, pa koga hoće, učvrsti na Pravom putu, a koga hoće, pusti ga da zaluta.'" (Tirmizi)

Uzvišeni kaže: "Gospodaru naš, ne dopusti srcima našim da skrenu, kada si nam već na Pravi put ukazao, i daruj nam Svoju milost; Ti si, uistinu, Onaj Koji mnogo daruje!" (Ali Imran, 8)

O ljudi, srcima je potrebna briga, kontrola, odgoj, čišćenje i praćenje. Zato je Vjerovjesnik, sallallahu alejhi ve sellem, rekao Husajnu ibn Munziru, radijallahu anhu: "Reci: 'Gospodaru moj, ukaži mi na Pravi put, i sačuvaj me zla moje duše.'" A, u oproštajnom govoru rekao je: "Utječemo se Allahu od zla naših duša!"

Nastojte i trudite se da popravite svoja srca i očistite svoje duše, jer onaj ko popravi svoju nutrinu, Allah će popraviti njegovu vanjštinu, ko popravi svoju tajnost, Allah će popraviti njegovu javnost. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, kazao: "Allah ne gleda u vaša tijela, niti u vaš izgled, nego gleda u vaša srca." (Muslim)

Pogledajte, Allah vam se smilovao, svoju vanjštnu pa je popravite, i pogledajte svoju nutrinu, pa je očistite! Budite iskreni s Allahom, Allah će ispuniti Svoje obećanje i postići ćete sreću ovog i budućeg svijeta.

Uzvišeni kaže: "O vjernici, bojte se Allaha i budite s onima koji su iskreni!" (Et-Tevba, 119)





O ljudi, najveća nevolja koja umrtvljuje srce i odvraća ga od svakog dobra i plemenitosti jesu tvrdoća i nemar, koji srce prekrivaju koprenom, udaljavaju od dobra i vjerovanja i vode ka grijehu i nepokornosti. Uzvišeni kaže: "I znajte da je među vama Allahov Poslanik; kad bi vas u mnogo čemu poslušao, doista biste nastradali; ali Allah je nekima od vas pravo vjerovanje omilio, i u srcima vašim ga lijepim prikazao, a nezahvalnost i neposlušnost vam omrazio. Takvi su na Pravome putu." (El-Hudžurat, 7)

"Zar nije vrijeme da se vjernicima srca smekšaju kad se Allah i Istina koja se objavljuje spomene, i da oni ne budu kao oni kojima je još davno data Knjiga, pa su srca njihova, zato što je proteklo mnogo vremena, postala nemilosrdna, i mnogi od njih su nevjernici." (El-Hadid, 16)

O vjernici, srca se razbolijevaju i umiru, otupljuju i postaju tvrda poput kamena ili još tvrđa. Uzvišeni kaže: "Ali srca vaša su poslije toga postala tvrda, kao kamen su ili još tvrđa." (El-Bekara, 74) Kada srca "presahnu" i otvrdnu, put do njih se zatvori, tako da na njih ne može djelovati savjet ili pouka, ne prihvataju lijek i uputu i ne povinuju se istini. Uzvišeni kaže: "Reci ti Meni ko će uputiti onoga koji je strast svoju za boga svoga uzeo, onoga koga je Allah, znajući ga, u zabludi ostavio i sluh njegov i srce njegovo zapečatio, a pred oči njegove koprenu stavio? Ko će mu, ako neće Allah, na Pravi put ukazati? Zašto se ne urazumite?" (El-Džasije, 23)

Oživite svoja srca zikrom – spominjanjem Allaha, i čuvajte se nemara, tvrdoće i Allahovih zabrana.

O ljudi, s obzirom na to da je Allah, džellešānuhu, odabrao srce, između ostalih organa, i učinio ga središtem vjerovanja, izvorom dobra i zla u čovjeku, On mu je dao i ključnu ulogu na Sudnjem danu, tj. učinio ga je glavnim obilježjem uspjeha na Sudnjem danu. Uzvišeni kaže: "... na Dan kada neće nikakvo blago, a ni sinovi od koristi biti, samo će onaj koji Allahu srca čista dođe spašen biti." (Es-Saffat, 83–84) Pametan i razborit je onaj ko propituje i obračunava svoju dušu i radi za ono što dolazi poslije smrti, a nemoćan i slab je onaj ko udovoljava prohtjevima duše i neosnovano se nada Allahovoj milosti. Obračunavajte svoje duše prije nego što





budete polagali račun, i izvagajte svoja djela prije nego vam ona budu vagana. Lakše ćete položiti račun sutra, ako svedete račun sa sobom danas i pripremite se za "veliki ispit" pred Allahom. Uzvišeni kaže: "Tada ćete ispitivani biti, i nijedna tajna vaša neće sakrivena ostati." (El-Hakka, 18)

Gospodaru, omili nam vjerovanje i prikaži ga lijepim u našim srcima, a omrazi nam nevjerovanje, griješenje i nepokornost i učini nas od razboritih. O Ti Koji okrećeš srca, učvrsti naša srca u Svojoj vjeri! O Ti Koji usmjeravaš srca, usmjeri naša srca ka pokornosti Tebi.

"Gospodaru naš, ne dopusti srcima našim da skrenu, kada si nam već na Pravi put ukazao, i daruj nam Svoju milost; Ti si, uistinu, Onaj Koji mnogo daruje!" (Ali Imran, 8)

